

Date – 24/12/2024

Time - 7:30 -7:40Hrs

REGIONAL NEWS BULLETIN

HEADLINES (MORNING)

- 1. Chakma autonomous district council (CADC)-ah BJP in MDC 13 neiin sorkarna an siam theih thu an legislature party hruaitu Pu Molin Kumar Chakma chuan vawiin khan District Council & Minority Affairs Secretary hnenah a hriattir.**
- 2. Home Minister Pu K. Sapdanga chuan tunhnaia Airfield khua a rukruk kaihnawihana nunna chan chungchangah mawhphurtu ni a rinhleh mi pahnih man an nih thu leh lunginah dah luh an nih thu a sawi.**
- 3. Nimin atang khan kumin Krismas leh Kum thar vuakveta Aizawl khawpui chhunga mipui bazar; kea kalte him zawk na'n lirthei tlanlohna hmun No Vehicle Zone chu kalpui tan a ni a, mipuite'n an hlut hle a, mipui tam tak ke-in Aizawl bazarah an kal.**
- 4. Prime Minister Narendra Modi chuan nimin khan tharum thawhna thehdarh tumna a awm thin chu paw a tih thu a sawi.**

<><><>

CADC

Chakma autonomous district council (CADC)-ah BJP in MDC 13 neiin sorkarna an siam theih thu an legislature party hruaitu Pu Molin Kumar Chakma chuan nimin khan District Council & Minority Affairs Secretary hnenah a hriattir.

CADC district BJP president Pu Durjya Dhan Chakma hnen atanga Akashvani Aizawl-in thu a dawn danin nimin khan Mizoram BJP unit president Pu Vanlalhmuaka kaihhruai-in CADC BJP legislature party an thukhawm a. Nimin khan MDC pakhat Pu Ajoy Kumar Chakma chuan ZPM chhuahsanin BJP a zawm nghal a. Heti hian BJP hian member 20 awmna CADC-ah hian BJP chan MDC 13 a nei ta tih Pu DD Chakma chuan a sawi a. BJP legislature party Aizawla thukhawm hian an hruaitu atan Pu Molin Kumar Chakma chu thlangin deputy leader-ah Pu Doymoy Daveng Chakma, secretary-ah Pu Kalasoga Chakma leh treasurer atan Pu Ajoy Kumar Chakma te thlan an ni bawk a. DC&MA secretary hnena sorkar an siam theih thu an thlen tawh avangin tul bik a nih loh chuan larsap hmuh kher a ngai tawh lo niin CADC BJP district president chuan a sawi a ni.

Sorkarin ruahmanna a siam fel hunah leh BJP legislature party hruaitu Pu Molin Kumar Chakma dilna hi pawm a nih hunah sorkarna siamna hun

pek an ni ang a. Pu Molin Kumar Chakma hi chief executive member (CEM) atana ruatin a ni hian a thawhpui tur executive member (EM) dangte leh nihna chelhtu dangte a ruat leh ang a. Council inkhawma thlawptu a ngah tawk leh tawk loh finfiahna hun pawh ruat a ni dawn tura ngaih a ni.

(Tun thla ni 11-a CEM ni lai Pu Rasik Mohan Chakma kaihhruai MNF sorkar paihthlak a nih hnu-ah sorkarna siam thei mai an awm lova. ZPM chuan MDC 10 nei-in sorkarna an siam theih thu December ni 16 khan larsap hnenah an thlen a. Hemi hnu hian BJP chuan sorkar an siam theih thu an thlen leh ta a ni.)

<><><>

HOME MINISTER

Home Minister Pu K. Sapdanga chuan tunhnaia Airfield khua a rukruk kaihhnawiha nunna chan chungchangah mawhphurtu ni a rinhleh mi pahnih man an nih thu leh lunginah dah luh an nih thu a sawi.

Airfield khuaa thil thleng chungchanga chanchinbumite a kawmnaah Home Minister chuan he thu hi sawiin midang inhnawih an awm leh awm loh dan anga chhui mek zel a nih thu a sawi a. Thihna tuartu chhungkuate chu Mizoram sorkarin a lainat thu leh dan anga hma lak zel a nih dawn thu a sawi a ni.

Home Minister chuan Mizorama dan bawhchhiatna veng turin khawtlanga tana thawktuten thahnemngai takin mahni khua leh vengah hma an lak thin thu leh hetiang thawkte hi sorkar chuan chhuanawm a tih thu a sawi a. Chutihrualin khawtlang hmalakna hrang hrangah dan huangchhunga chet thin a pawimawh tih hriat a ngai a ni a ti a. Khawtlang leh ram tana thil tha lo do kawngah fimkhur taka dan huangchhunga chet zel ni se, dan bawhchhetu ni a rinhleh te pawh a rang thei anga police leh sorkara mawhphurtute kuta hlan thuai thin ni se an duh thu a sawi a. Mitinin mihring an nih anga dikna chanvo an neih hlu tak inzahsak thiam zel a pawimawh thu a sawi bawka ni.

<><><>

NO VEHICLE ZONE

Nimin atang khan kumin Krismas leh Kum thar vuakveta Aizawl khawpui chhunga mipui bazar; kea kalte him zawk na'n lirthei tlanlohna hmun No Vehicle Zone chu kalpui tan a ni a, mipuite'n an hlut hle a, mipui tam tak ke-in Aizawl bazarah an kal.

Coordination Committee on Traffic Management in a ruahman angin Krismas hma bikah chuan nimin leh vawiinah te No Vehicle Zone hi Chanmari leh Zodin Square inkarah zing dar 10:00 atanga tlai dar 4:00 chhungin kalpui tur a ni a. Kumhlui thlah ni, ni 31-ah kalpui a ni dawn bawka ni. Nimina No Vehicle Zone kalpuiah hian mipui tam tak kein an bazar nghal a. Nidanga lirthei dahna leh lirthei tlanna hmunah mi tam takin thil zuarin a inphochhuak a, naupang te infiamna leh enawm hrang hrang phochhuah a ni bawka ni. Nimina No Vehicle Zone-a bazar Pu Lalremruata chuan No Vehicle Zone kalpui chu mi thenkhat tan harsatna siamtu ni thei mahse zalen taka mipuite bazarna atana hmalakna tha tak ni a a hriat thu Akashvani a hrilh.

No Vehicle Zone kalpui mekah hian lirthei tlan tawpna pahnih Chanmari leh Zodin Square-ah te traffic police thahnem takin an vil a. Lirthei te chu an passenger te an dah tir hnuah tlantir leh zel an ni a. Heng a tanna pahnih atang hian mipuite kein an kal tan a ni.

No Vehicle Zone hian Emergency duty bakah, natna avanga Damdawiin pante a huam lo a. Coordination Committee on Traffic Management te chuan lirtheia chuang te chhuk na tur bakah lirthei chi hrang hrang hunna tur ruahmanna an siam bawk a ni.

<><><>

AIR NEWS ON SOCIAL MEDIA

Chanchinthar hi Akashvani Aizawl atanga puang a ni a. AIR News Aizawl Youtube Channel, All India Radio News Aizawl Facebook page leh newsonair.gov.in-ah te, chanchinthar hi ngaihthlak leh chhiar theih a dah a ni.

Chaghnu dar 2 leh a chanve-ah Chanchinthar puan leh a ni ang.

<><><>

TC LALMUANKIMA

Akashvani Aizawl Regional News Unit a nihna pawimawh tak chelhtu TC Lalmuankima chu a chetsualna a a lu a tauh avangin nimin khan Aizawl Hospital-ah a thi.

TC Lalmuankima hian kum 2004 September thla atangin Akashvani Aizawl (All India Radio)-ah typist hna chelhin a zawm a. Hemi hnu hian Reporter, Correspondent, NRT leh Editor hna te a chelh zui a. Tunah hian New India Samachar buatsaihtu a ni mek a ni. TC Lalmuankima hi nimin khan Luangmual Vengah vuiliam a ni.

TC Lalmuankima hi thian ngaina leh thian kawm thiam tak a ni a, tawng tam si loa fiamthu duh leh in sawisak fiam nuam ti tak a ni thin. A thiante tan ui a nei ngai lo a, a thiante pawhin an ngaina in an hmangaih hle a ni.

December ni 18 zan khan an kawmchhak te ina a leng haw lam chu step te laiah tlusual palhin a lu a sawh a, nikhaw hre loin a awm zui nghal. A rang thei ang berin Aizawl Hospital pa pui niin enkawl zui a ni a, doctor ten theihtawp chhuah mah se nimin khan a boral ta a ni.

TC Lalmuankima hi Mizoram Journalist Association (MJA) member a ni a, MJA President Pu C. Lalrambuatsaiha chuan TC Lalmuankima hi a ui thu a sawi a, amah sun nan hian Mizoram district hrang hranga MJA Press Club-ah te chuan MJA Flag chu a ngul chanve a zar a ni.

<><><>

AR

Assam Rifles chuan an hnen atanga training nei, Central Armed Police Force hrang hranga tling zui ta te lawmpuina hun chu nimin khan an hmang.

Pre Recruitment Training an neih lai hian physical leh written exam an bei a, Aizawl khawpui leh a chhehvela thalai mi 55 training zinga 32 ngawtin

hmun hrang hrangah hna an hmu, an zinga 25 chu mipa niin midang pasarih chu hmeichhia a ni thung.

Nimina hun hmanah hian mi 20 an inlan thei a, lawmpuina Certificate pek niin zirlai hlawhtlinna changte chuan Assam Rifles hmalakna fakawm an tih thu an sawi a ni.



PM

Prime Minister Narendra Modi chuan nimin khan tharum thawhna thehdarh tumna a awm thin chu pawl a tih thu a sawi.

New Delhi-a Catholic Bishops' Conference of India (CBCI)-in Krismas lawmna a buatsaihah thu sawiin, PM Modi chuan Germany a Krismas market beihna awm chungchang a sawi a, khatiang harsatna awm thei do turin mipuite a chah. He huna thu sawi naah hian Prime Minister chuan India chuan foreign policy-ah national interest leh human interest a dah pawimawh ber a ni, a ti.

India chuan a mipuite chu khawi hmunah pawh awm se, eng harsatna pawh tawk se, himna hmuna hruai chu a mawhphurhnaah a ngai tih a sawi. Indona tuar nasa Afghanistan atanga Father Alexis Prem Kumar-a him taka hruai kir a nih khan a tan chuan hun lawmawm tak a nih thu a sawi a; kum sawm kalta khan thla riat chhung zet chutah chuan a tang a ni. Father Tom-a chu thla tam tak sal a nih hnuah Yemen atanga chhanchhuah a nih thu a sawi bawk. Prime Minister chuan, a sorkar tan chuan heng mission zawng zawng hi diplomatic mission mai ni lo in chhungte hruai kir leh na kawng a nih thu a sawi .

